



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.307/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Arsim Hamzaj - kryesues, Kymete Kicaj dhe Skender Çoçaj - anëtarë, duke vendosur përkitazi me ankesën e Subjektit Politik Lëvizja Vetëvendosje (LVV), me seli në Prishtinë, paraqitur kundër Subjektit Politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 04.02.2025, merr këtë:

VE N D I M

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.307/2025 e datës 02.02.2025.
- II. Subjektit Politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 4,100.00€ (katërmijë e njëqind) euro.
- III. Detyrohet Subjektit Politik Partia Demokratike e Kosovës (PDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë 02.02.2025 PZAP-i, ka pranuar një ankesë nga subjekti politik Lëvizja Vetëvendosje (LVV), me seli në Prishtinë, me të cilën pretendon se më 01 shkurt 2025, Qendra e Lëvizjes Vetëvendosje, në Pejë kanë vërejtur posterë të vendosur në hapësirat/rrugët publike, konkretisht në hapësirat e Palestrës Sportive "Karagaçi në rrugën "UÇK", në Pejë të kandidatit për deputet nga radhët e Lidhjes Demokratike të Kosovës - LDK, Zeqir Gjukaj.

Tutje në ankesë theksohet se një veprim i tillë është në kundërshtim me nenin Rregulloren Zgjedhore Nr.07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimi Financiar, neni 7, par.2, pika 2.4.

Andaj, duke u mbështetur në bazën ligjore dhe argumentet e lartcekura, gjithashtu bazuar tashmë në praktikën e PZAP-së, mes tjerash me vendimet Anr. 210/2025, Anr.57/2025 parashtruesi i ankesës kërkon që masa e sanksionit të vendoset në përputhje me legjislacionin në fuqi dhe që masa e sanksionit të jetë më e lartë duke marrë parasysh përsëritjen e shkeljes. Si provë parashtruesi i ankesës ka bashkangjitur një fotografi që dëshmon vendosjen e posterit në kundërshtim me LZP.

Më datë 03.02.2025, PZAP-i, e njoftoi Subjektin Politik Lidhja Demokratike të Kosovës (LDK), me seli në Prishtinë, për ankesën e paraqitur kundër tyre, duke i dërguar kërkesë për përgjigje deri me 03.02.2025 në ora 19:00.

Në përgjigje në ankesë të paraqitur me datë 03.02.2025, Subjekti Politik Lidhja Demokratike të Kosovës (LDK), ka kundërshtuar ankesën e paraqitur nga subjekti politik Lëvizja Vetëvendosje (LVV), duke theksuar se kandidati për deputet nga radhët e Lidhjes Demokratike të Kosovës – (LDK), Zeqir Gjukaj, me rastin e vendosjes së posterit në palestrën “Karagaçi” në Pejë ka bërë shkelje të Rregullores Zgjedhore Nr.07/2024 nuk qëndron sepse z.Gjukah si krejt kandidatët tjerë ditën e tubimit të mbajtur në Pejë, më 26.01.2025 kanë pasur të drejtën e shfrytëzimit të hapësirave të jashtme dhe të brendshme me pëlqim të përgjithshëm lëshuar nga menaxheri i palestrës z.Egzon Gjuka.

Si provë në Përgjigje në ankesë Subjekti Politik LDK, ka bashkangjitur një sqarim të Komunës së Pejës, mbi shfrytëzimin e palestrës “Karagaçi” në Pejë, për datën 26.01.2025.

Paneli, pasi që shqyrtoj të gjitha shkresat e lëndës gjeti se:

Ankesa është e bazuar

Paneli, nga fotografitë e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë ka konstatuar se subjekti politik LDK, ka vendosur posterin e kandidatit për deputet nga radhët e Lidhjes Demokratike të Kosovës LDK, Zeqir Gjukah në hapësirat publike, konkretisht në Palestrën Sportive “Karagaçi” në rrugën “UÇK”, në Pejë dhe më të njëjtin veprim subjekti politik Lidhja Demokratike e Kosovës, LDK, ka bërë shkelje të nenit 34, paragrafi 1 të Ligjit Nr.08/L-228 për Zgjedhjet e Përgjithshme në Republikën e Kosovës LZP, konkretisht neni 34, paragrafi 1 nën paragrafi 1.2 i LZP-së parasheh: *"1. Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: 1.2 vendosja e njoftimeve, pllakateve dhe posterëve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugët publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa leje e pronarëve ose shfrytëzuesve.*

Paneli ka vlerësuar sqarimin e bashkangjitur nga subjekti politik LDK, e lidhur me datë 25.01.2025, në mes të palëve Komuna e Pejës dhe subjekti Lidhja Demokratike e Kosovës (LDK), Dega në Pejë, mirëpo të njëjtën nuk ka mundur ta merr për bazë me rastin e vendosjes për këtë çështje, kjo pasi që në sqarimin e ofruar si provë theksohet se Lidhjes Demokratike të Kosovës, Dega në Pejë i është lejuar mbajtja e tubimit zgjedhor të dielën me datë 26 janar 2025, prej orës 10:00 deri në ora 20:00, ndërsa ky poster ka qenë i vendosur edhe me datën 01.02.2025, e për të cilën nuk mund të vërtetohet fakti se të njëjtat

hapësira i ka marrë për vendosjen e posterëve nga Komuna e Pejës, konkretisht në Palestrën Sportive "Karagaçi" në rrugën "UÇK", në Pejë, përkatësisht ka leje për ta bërë një gjë të tillë.

Neni 120 paragrafi 1 nën paragrafi 1.3 të LZP-së thekson se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet të vendosë një gjobë ndaj një subjekti politik, në vlerë deri në pesëdhjetëmijë (50,000.00) Euro.

Përveç kësaj një veprim i tillë sanksionohet edhe me nenin 24 paragrafi 6 nën paragrafi 6.1 Rregullës Nr.01/2024, ku përcaktohet se "subjekti politik që është përfitues i fondeve për financimin e subjekteve politike përmes Buxhetit të Republikës së Kosovës dënohet me gjobë deri në njëzetmijë (20, 000.00)euro.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik LDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje në Kosovë që do të thotë se i njëjti është i njoftuar me rregullat zgjedhore, dhe të njëjtit subjekt politik për të njëjtën shkelje i është shqiptuar gjobë nga PZAP-i, me Vendimin Anr.210/2024, të datës 29.01.2025.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Lidhja Demokratike e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin të pabazuara, të pa qëndrueshme dhe pa bazë ligjore si në dispozitat e Ligjit për Zgjedhje, dhe si të tilla nuk ishin me ndikim për një vendim ndryshe, për çka Paneli, vlerësoi dhe vendosi si në dispozitiv të këtij vendimi.

Nga arsyet e theksuara me lart, e në kuptim të nenit 34 paragrafi 1 nën paragrafi 1.2, nenit 118 paragrafi 1, neni 120 paragraf 1 nën paragrafi 1.3, të LZP-së, nenit 10 paragrafi 1, nën paragrafi 1.2 të Rregullores Nr.01/2024 për Procedurat e Parashtrimit dhe Vendosjes së Ankesave vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.307/2025 më datën 04.02.2025

Kryesuese e Panelit
Arsim Hamzaj



Këshilla Juridike: Kundër këtij vendimi nuk është e lejuar ankesa sipas nenit 118 paragrafi 4 të LZP-së.